



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Bihar ya India nung ozüng alema
inyakba yimtiba lir: Rahul Gandhi

Sinner-i tang mezüngbuba
Wimbledon kokogo

VOL. XXII ISSUE NO. 270 (ADOK 270)

DIMAPUR

SANGTENNÜ (TUESDAY)

CHITENI (JULY) 15, 2025

₹ 5.00

Sübokrem meshiba mechi NU Dean ka pua lir

New Delhi, Chiteni/July 14

(Agencies): Vendor ka dang nungi sen lakh ana sübokrem meshiba aser Department of Botany nem osettsüset aser UPS batteries agütsürtem merenshiba mechi CBI-i Nagaland University Dean ka puogo, ta ketdangsür temi Hombarnü sangdong ka nung ashi.

Institution nem takoksa bener arutsütsü aser pei ajangzüksü tejangja nung ochi mashi aser ozüng alema mapa balala inyakba mechi Senior Professor Chitta Ranjan Deb, Dean of School of Sciences, Nagaland University ya apu, ta ketdangsür ajanga ashi.

FIR nung, Prevention of Corruption Act, 1988 (as amended in 2018) indang Under Section 7 nung ajemdaker Dr. Chitta Ranjan Deb anema ken o ka benoka bushisüngdangtsü CBI, ACB, Guwahati nem nungloksü, ta shia lir.

CBI, ACB Guwahati ajanga July 12 nü benokba FIR nungya, tim masüba nung tajangzüik mesüra sübokrem agitsü mechi bidders aser company balala

nem scientific equipment aser consumables indang supply orders agütsüba nung mapa meshidak inyakba nung Deb dena lir, ta shia lir.

Deb-i mapang balala nung sen lakh pongu jenjang supply order atema aser Jain nungi sen lakh 23 jenjang oset/chiyongtsü alizüksü atema M/s Jaldhara and Company, Jorhat, Assam nungi Ravindra Kumar Jain dang sübokrem sen meshiba indang osang angazük, ta CBI ajanga ashi.

Ano UPS batteries aser danga osettem indang supply orders agütsütsü mechi Deb-i CS Power Solutions, Jorhat nungi Gulzar Hussain dang sübokrem meshia liasü, ta CBI ajangasa ashi.

Sübokrem sen lakh ana ya meshitsü asoshi Jain ajurutsü atema July 12 nü Deb ya Jorhat-i aotsü ta osang angazükba sülen CBI ajanga FIR ya züluok.

Osang ajangasa ashiba agi, Deb ya kasa anogo Gulzar Hussain danga sübokrem sen 15,000 meshitsü sentong liasü.



Chief Minister, Dr. Neiphiu Rio-i anir Nagaland Delegation den Indian Ambassador to the Russian Federation, Vinay Kumar aser tongtipang nisungtem July 13, 2025 nü Moscow, Russia nung Bharat Utsav 2025 alidang tangokba noksa ka yangi angur.

Gol-i Wesean region kodanga mamokbangtettsü: NSCN/GPRN

Dimapur, Chiteni/July 14

(TYO): Hoyat aser Pangsau area nung ULFA-I aser NSCN camps nung tenük yoker Nagaland anüdoklen tesem ana nung drone amshia amakba atema Yung Aung-i aniba NSCN (K) ajanga Indian security forces aitsüogo.

Hombarnü sangdong ka agütsüba nung, anepdang 2:00

ako aser 4:00 ako tsüngta amakba mapang ULFA-I lenir Lt. Gen. Nayan Asom densema nisung aika asü, ta NSCN/GPRN sangdong ajanga ashi.

Asom ya linük asoshi bendanga agütsüba nübu tajung ka liasü, shibai Assam nüchiso asoshi armed movement nung tongti shilem agi aser pa asüba ya ULFA-I atema kisüng masü saka "oppressed Wesean nations" ajunga aoshi takoksa tulu lir, ta NSCN/GPRN (Yung Aung) sangdong ajanga ashi.

"Iba ama tashiyim mapa inyakba NSCN/GPRN ajanga khukhua aitsür aser sür aliba tasü tait lenir aser yirur aliba linük tenzüker nem akhum agütsür. ULFA-I den asükhu lemsateper aser iba takoksa

anogo nung parnok den külemi mang ayimer," ta ashi.

"Tesüiba ita ishika tsüngta Government of India-i NSCN/GPRN cadres tem dak tashiyim mapa inyakba tali kumogo, aser tepsetba aser merenshiba tanen makai lir," ta sangdong ajanga ashi.

India sorkari advanced technology aser nok-nü amshiba ajanga region mamokbangtettsü, ta parnoki ashi.

"India-i nok-nü tajung aser technology tasen aser tajungba amshia tim masüba rara tenzüktettsü ama bilema lira aser WESEA region amokbangtsü tebilemba lira, ajibo aibelen tulu asütsü," ta NSCN/GPRN (Yung Aung) ajangasa ashi.

NE nung Passport Seva Mobile Van Service tenzükogo



Ministry of External Affairs nung Joint Secretary for the Passport Seva Project and Chief Passport Officer, Dr. K.J. Srinivasa aser ketdangsürtem July 12, 2025 nü Gauhati University, Assam nung Passport Seva Mobile Van Service semzükbä mapang tangokba noksa nung angur.

Guwahati, Chiteni/July 14

(Agencies): Meta talang nung alirtemi passport services temelaba nung agitettsü asoshi mera ka agia Ministry of External Affairs nung Joint Secretary for the Passport Seva Project and Chief Passport Officer, Dr. K.J. Srinivasa-i July 12, 2025 nü Gauhati University, Assam nung Passport Seva Mobile Van Service semzükbä liasü.

Ibai Ministry indang "Passport Seva Aapke Dwar" sentong nung shilem ka lir, koba North Eastern region nung meta talang nung alir nem passport services agütsütsü nükjiding lir.

Tang semzükbä mobile van service ya region nung meta talang leni yoktsü, anungji nüburtemi ayong ayonga passport applications

agütsütettsü.

Iba service yagi meta talangba nunga passports aser iba dak sendakba services tem agütsütettsü. Guwahati nung Regional Passport Office (RPO) kübok North Eastern states trok nung tang Passport Seva Kendras trok aser Post Office Passport Seva Kendras 19 lir.

Iba mobile van ya "one-stop shop" ka lir, kong applicants temi passport application submission atema nüngdakba inakyim renema inyaktettsü, ta Dr. Srinivasa-i ashi. Linük tesem balala nung aliba RPOs 37 shia nung mobile van ka-ka agüja lir aser tarutsü nung vans timba kumdaktsütsü sentong lir ta pai ashi.

"Ibai Ministry of External Affairs ajanga passport services tajungba nung agütsütsü asoshi

bendanga agütsür inyakba kuli lir. Onoki nübur ajunga, talisa meta talangtiba nung aliba atongtsü temulungtetba nung lir," ta Dr. Srinivasa-i ashi.

Iba sentong nung RPO Guwahati, TCS aser Gauhati University nungi ketdangsürtem dena liasü.

Iba mapang Dr. Srinivasa-i Assam's Director General of Police (DGP) Harmeet Singh, Additional DGP, Hiren Chandra Nath aser Chief Postmaster General (CPMG), Col. Arvind Varma densema tongtipang stakeholders tem ajuru aser Guwahati nung aliba RPO aser Passport Seva Kendra (PSK) semdanga ketdangsürtemi meranga inyakba asoshi tenüngsang agütsü aser maneni ochishia inyaksü ayongzüka liasü.

Nirmal Jain ken o bushitetba nübur nem metetdaktsütsüla: DNSU

Dimapur, Chiteni/July 14

(TYO): Dimapur Naga Students' Union (DNSU) ajanga district administration aser ketdangsürtem dang mapa tamajung inyakba nung dena alisang Nirmal Jain dak anogo 15 tsüngta nung tapet mera agiang ta takhangba agüja lir.

DNSU ajanga Hombarnü sangdong ka agütsüba nung, Nirmal Jain-i mapa tamajung inyakba indang bushisüngdangba nung tebushitetba tejangja maliba aser mapang talangka kecha mashi yutsüba atema tebilemtsü lemsatepa liasü. Taoba mapanga ketdangsür nem tezüluba tejangja agütsüogo aser iba ken o kanga junga bushisüngdangtsü ajungshia lir, ta Union-i nenshia ashi.

Nirmal Jain-i ashikülak yimya amshia indigenous certificate agizükba aser ali kimong aliba densema mapa

tamajung inyakba otsü liaka pai tanen makai jenzükjenshia senzüteter.

Anungji administration inakyim nung ang temulung masür, kechiaser administrators temi nüburtem dang par tebushitetba sayutsü mapang tongja tongogo, ta DNSU sangdong ajanga ashi.

Nübur shinga Nirmal Jain den ali aliba aser ayokba maparen nungi pila alitsüla aser shirnoki yamaji inyakdir pei khuret asütsü, ta DNSU ajanga ashi.

DNSU ochi asoshi nokdaktsü aser raratsü temulungtetba nung lir, anungji ketdangsür temi mapang shidak nung nüngdakba mera agia mapa meinyakra, Nagaland nung aliba nüburtem teyari nung ochi obendang agütsütsü asoshi ozü sasa mera agitsü, ta ashi.

DNSU-isa nüburtem dang saksalema alitsü aser pei temeden kumzüka ayutsü asoshi renema alitsü ayongzüka liasü.

DISHA Mokokchung senden takok manung kaogo



Mokokchung nung DISHA senden takok ngua agir külen, Lok Sabha MP, S. Supongmeren Jamir den DISHA züngsemtem külemi tangokba noksa nung angur. Mokokchung, 14th July, 2025.

Mokokchung, 14th July (TYO): Lok Sabha MP, S. Supongmeren Jamir lenisüba nung District Level Coordination & Monitoring Committee (DISHA), Mokokchung senden Mokokchung Deputy Commissioner conference hall nung takok ngua menogo.

Supongmeren Jamir shiba DISHA committee nung mendenbuba lir, pai iba senden nung jembidang, iba luden ya tongtibangsa central sorkar-i state balala dangi yokba mapatong (schemes) kechisa lir, item jagi nüburtem shitak atonger matonger? Metongi lira koba kuli ajanga matonger? ta asadangtsü asoshi tentetba lir, ta metetdaksü.

Central sorkari yokba mapatong balala inyakdang tsükdakradang ajurubatem, senotsü shitak angur mangur? Mesüra item mapatong indang inyakyimji yimdak putu yimsüsür/ketdangsür mesüra jila nung ward ketdangsürtem nem

angatetdaksütsü aser item teyari balalatemji tera tonga (grass root) awajemtsü nükjidong nung iba senden ya akar, ta pai ashi. Ibai department kar arishitsü mesüra alentsü merangba mapa ka masü saka sorkar sentong angateta tetuyuba ama shitak inyaksü asoshi lir, ta paisa jangjashitsü.

Paisa alima tzü mopung wazüka aser kümzüka yutsü asoshi süngdong atemtsü asoshi ajungshidang, mulungtet telok Ao Senden aser yimdak putu yimsüsürtemi anir süngdong atemtsü asoshi mapatong kar inyakdaksünür, ta mepishia metetdaksü.

Iba senden nung Mokokchung D.C, Ajit Kumar Verma (IAS) shiba DISHA committee nung member secretary lir, pai tarurtem pela-a agizük aser DRDA Project Director, Imyapangla-i melepzüng o lemsatop. Rural development department-i PMAY & MGNREGA, PHED-i JJM, Social Welfare

Dept-i ICDS, Agriculture Dept-i PMKSY aser Education dept-i SSA scheme onük nung ketdangsürtemi powerpoint presentation agütsü. Iba den PM POSHAN, drug addiction & abuse, 'ek ped maa ke naam' onüktem nung shisa lemsatop.

DISHA senden temer külen Hon'ble MP S. Supongmeren Jamir-i Dr. Imkongliba Memorial District Hospital (IMDH), Mokokchung semdanga yangji central sorkari inyakba mapatong kar reprang aser Mokokchung Chief Medical Officer, IMDH Medical Superintendent aser Ao Senden lennirtem den tang mozüki tesüdak aser IMDH nung rongdak nüngdakbatem indang sensaksema liasü. Paisa mezüng Nagaland Chief Minister, P. Shilu Ao nüngtem yangluba park koba Imkongmeren Sports Complex anasa lir, ibajia semdanga concerned department ketdangsür den sensaksema liasü.

Mokokchung nung yi raksa intoktsü

Dimapur, Chiteni/July 14 (TYO): Mokokchung kübok ken o balala nung ozüng alema apuba yitem raksa intoktsüogo. Chief Judicial Magistrate Mokokchung, Julian Stilhou, NJS-i tetuyuba agütsüba dak ajemdaker July 12 nü iba jenjang agia liasü. Destruction Committee nung APP Mokokchung, SDPO Mokokchung, DPRO Mokokchung aser PI Mokokchung nung densema liasü. Chief Judicial Magistrate-i yi raksa intoktsüba tesem semdangba sülen züngsemtemi Rum bottle 5436, can Beer 336 aser whiskey bottle 48 raksa intokja liasü.

NHPS-i mozüki indang metetdaksü

Dimapur, Chiteni/July 14 (TYO): Nagaland Health Protection Society (NHPS)-i, Ayushman Bharat Pradhan Mantri Jan Arogya Yojana (AB PM-JAY) aser Chief Minister Health Insurance Scheme (CMHIS) kübok mozükitem kar tanaben züngoksemshiba indang metetdaksüogo. Empanelled mozükitem yamai alitsü:i. Eden Medical Centre, Dimapur ii. Olive Christian Hospital and Research Centre, Dimapur iii. Bethel Medical Centre, Kohima . Beneficiaries temi AB PM JAY aser CMHIS scheme kübok cashless treatment atema item mozükitem semdangtetsü. Osang tejangjaba agitsü atema Toll-Free Helpline No: 1800-202-3380 den tongteprateptsü kasa sangdong ajanga metetdaksüogo.

NSCW office-i belener ogo

Dimapur, Chiteni/July 14 (TYO): Nagaland State Commission for Women (NSCW)-i sangdong ka ajanga, ken o dak sendaka alirtem ajak dang Commission indang office belener aoba mettedaksüogo. Iba dak sendakba nung tongtepratep ajak teküboklen agüja aliba address den asütsü metetdaksüogo.

Nagaland State Commission for Women

Nagaland Commission Complex, 3rd floor, Behind Directorate of Social Welfare ,New Secretariat Complex, Kohima-797001, Nagaland , 8974104811 (M) email: nwcommission@hotmail.com

Merekmeju sentong ayongzüka agi

Dimapur, Chiteni/July 14 (TYO): ADC Pfutsero, Mhalo Humtsoe tetuyuba dak ajemdaker July 12 nü Pfutsero jila nung merekmeju sentong ka ayongzüka agiogo. Iba sentong nung sorkar tenzükertem ajak aser nüburtemi Town Council den longjemer shilem agia liasü. June 12 nü DPDB senden amenba mapang telemtetba agiba dak ajemdaker iba merekmeju sentong ya ayongzüka agiogo. Senden nung Town Councils den longjemer sorkar tenzükertem ajak aser nüburtemi itashia merekmeju sentong ayongzüka agitsü telemtetba agia liasü.

Jakhama nung sensitization sentong agi

Dimapur, Chiteni/July 14 (TYO): "Welcome Dear Daughter - Celebrate Her Birth, Nurture Her Growth" omen nung ajemdaker July 12 nü Sub-Divisional Office, Jakhama, Kohima nung sensitization sentong ka agiogo.

Iba sentong ya Kohima District Administration, SANKALP - District Hub for Empowerment of Women (DHEW) Kohima, Naga Hospital Authority Kohima (NHAK), aser Department of Post nung longjemer agia liasü.

Sentong ya tetsür tanur senti süa amshitsü aser anepalua anitetsü koda tongtibang iba indang tangazükba agütsütsü nükjidong nung agia liasü. Sentong nung Paediatrician aser SNCU Medical Officer, NHAK Dr. Neiphrenuo Sekhose-i angati temang tendangtsüba densema service balala agütsüba den inyakyim balala benoka inyakogo.

Department of Social Welfare den sendaktepa District Administration-i, sentong agiba tesem nung tanur

arishi küm 0-5 tsüngda alirtem Aadhaar nung züngoksemsüogo.

Sukanya Samriddhi Yojana aser Pradhan Mantri Matru Vandana Yojana (PMMVY) amala aiür chanu aser tetsürtem atema scheme balala dak sendakba nung financial literacy sessions-a ka agia liasü.

DHEW Kohima nungi Financial Literacy Specialist Vidilhounuo Solo-i, PMMVY tajangzüng indang rasa ashi, aser Department of Post nungi Sharon Losu-i, tetsür aser aiür chanutem ajungkettsü atema postal schemes balala benoker aliba indang metetdaksü.

Iba anogomung nüngdem nung EAC, Ane Khieya den tanga ketdangsürtemi tetsür tanurtem tenüng nung süngtong temja liasü, koba parnok ainba aser lokti nung parnok koda tongtibang iba indang temaittsü liasü.

Sentong ya Gender Specialist, Vikeduoze Sorhie, DHEW Kohima lenisüba nung agi aser EAC Kohima Ane Khieya-i lokti pela agizükba o jembia liasü.

District Level Coordination Committee senden menogo



Dimapur, Chiteni/July 14 (TYO): Mon District nung National Tobacco Control Programme (NTCP) kübok 9buba District Level Coordination Committee (DLCC) July 11 nü Deputy Commissioner indang, Conference Hall, Mon nung menogo

Iba senden ya Mon Deputy Commissioner Wennyei Konyak lenisüba nung mena liasü. Senden nung pai, tawa Tobacco Free School asütsü ta sangdongba School 19 nem tenüngsang agütsü aser parnok nem kuli kaket agüja liasü.

DC-i ashiba agi, moko ya kanga mesenprongtsü substance ka koba intoktsü kanga tasak lir. Paisa, school aser college tem aikati aser

talisa sub-division nung school aser college tem-i parnok riju ya Tobacco Free School zone asütsü ta sangdongba ngua kanga ajungmesor, ta ashi. Pai, sentepa aliba lokti dang Schools aser educational institution tem dak alaka tanga tesemtema tobacco free zone kümdaksütsü atema ajungmesotsü ayongzüka liasü.

Konyak-isa, Chenwetnyu yimtsüng nem tenüngsang agütsü. Iba yimtsüng ya Mon district nung mezüngbuba tobacco free yimtsüng lir. Paisa, nüburtem dang moko achiba ajanga takoksa ajangshiba aser iba ajanga kibong aser lokti dak kongshiba indang tangazükba agütsütsü ajungshia liasü.

Kasa mapang nung NTCP Mon Dr. Esther Chophy Ngulli-

i, NTCP inyakyimtem indang metetdaksü. Laisa, school 19-i tawa parnok riju tem Tobacco Free School asütsü ta sangdongba metetdaksü. Lai ashiba agi, district nung school 77, college 2, kibong 69 aser yimtsüng ka Tobacco Free Zone lir.

Maneni lai, district nung COTPA 2003 tashi itshidaksütsü atema Enforcement Drive indang metetdaksü aser ketdangsürtem aser talisa Police Department, lokti tentet balala aser nüburtem dang Enforcement Drive atema longjemer inyaksü ajungshia liasü. Lai, ita nung khenbosa enforcement drive benoktsü mepeshia liasü.



July 14, 2025 nü New Delhi nung All India Adivasi Congress-i ayongzükba sentong ka nung Lok Sabha nung Opposition Lenir, Rahul Gandhi-i tribal lenirtem den sensaksemdang tangokba noksa nung angur.

Murmu-i Ladakh, Haryana aser Goa atema Anghtem shim

New Delhi, Chiteni/July 14 (Agencies): Hombarnü Tir, Droupadi Murmu-i Ladakh Union Territory, Haryana aser Goa state tem atema Angh tem shimogo.

Prof Ashim Kumar Ghosh Haryana nung Angh shim, Pusapati Ashok Gajapathi Raju Goa Angh shim aser Kavinder Gupta Ladakh Lieutenant governor shim.

Tir Murmu-isa Ladakh union territory nung Brig (Dr) BD Mishra (Retd)-i Lieutenant Governor menden nungi sodi meshiba agizük. Pa melen taoba mapang Jammu & Kashmir nung deputy chief minister, Kavinder Gupta shim.

Rashtrapati Bhavan

sangdong ajanga, Prof Ghosh-i 2021 küm nungi Angh inyaksang Bandaru Dattatreya melentsü aser Gajapathi Raju-i PS Sreedharan Pillai melentsü, ta metetdaksü.

Kavinder Gupta ya BJP lenir tain ka lir aser pa taoba mapang Jammu & Kashmir nung deputy Chief minister inyaka liasü. Gupta-i Jammu mayor elections nunga 2005-2010 tsüngda asemben tashi takok ngua liasü.

Prof Ashim Kumar Ghosh ya shisashir ka aser West Bengal nungi BJP lenir tain ka lir. Pa Vidyasagar College, Kolkata nungi Political Science nung degree anguba sülen küm aika professor inyaka arur

tesüsa yimtenren nung ajemok.

Ghosh-i 1991 küm BJP nung aden aser 1999 küm pa West Bengal BJP Tir shima liasü. Pa Tir inyakba mapang nung West Bengal nung party tera-yanga liasü.

Pusapati Ashok Gajapathi Raju ya Andhra Pradesh kübok Pusapati nung Vizianagram tamarener kibong nungi lir aser pa ya TDP nung tongti lenir ka lir.

2014 küm nungi 2018 küm tashi pa civil aviation minister inyaka liasü, ajisüaka TDP-i NDA teloktep toktsüba sülen pa minister menden nungi anena liasü. Pa ya Vizianagram nungi MLA kümsük tenetben inyakogo.

Modi-i nisung 51,000 nem mapa nung shimokba shidi agütsü

New Delhi, Chiteni/July 14 (Agencies): Honibarnü Ato kilonser Narendra Modi-i nisung 51,000 nem Central sorkar mapa nung shimokba shidi agütsüogo; ibaji densemabo 2022 küm October ita nung Rozgar Mela tenzükba sülen nungi tang tashi nung nisung lakh 10 dak tema nem mapa nung shimokba shidi agütsüogo.

Mapa nung shimoker tasenpurtem den video conferencing ajanga jembidang Ato kilonser Modi-i, India nung tashi tulu ana lir ta alimai meteta dang lir, aser tashi tulu anaji ka demography aser ka democracy lir; tetezü alima nung lanur nütsüng teimba aliba linük aser alima nung democracy tulutiba lir, ta ashi.

"Lanurtem tashiji linük tarutsü jenjang tajung akümtsü atema tashi aser tenangzükba tulutiba lir. Iba tashi ya azükaru atema asalentong ka

kümdaktsütsü asoshi ozü sorkari aonung-anüngdang methitemi inyaker," ta pai metetdaksü.

Tejakleni aotsü atema ajaki maongka angutsü temsüa lir, aser iba atemaji teyari agütsürtemji sorkar asütsüla, ta pai ashi.

"Kü medemertem aser lanurtem. Ni nenok dak tamang akar. Ni nenok dak nungi tuluka imlar. Nü nem kechi mapa nunglokttsüdir nungloktjaka sensotem tama südakjang. Parnok yariang aser parnok khuret pungbadaktsüba ajanga linük kanga keraa aintsü," ta pai ashi.

Tawa Union Cabinet-i Employment Linked Incentive (ELI) scheme agizükba dak sendakba nung Modi-i, "Private sector nung tang mezüng mapa angur lanurtem shia nem sorkari sen 15,000 agütsütsü, iba tetezü mezüngbuba itasenjibo sorkari agütsütsü. Iba atemaji sen 1 lakh crore lemozüktsüogo," ta

metetdaksü.

Tawa International Labour Organisation (ILO)-i sangdongba report nung ajemdaker Modi-i, tesüba küm 10 tsüngda India nung senso crore 90 bo welfare schemes agi ayimjemogo aser ibaji social security ulushitsü atema nüngdak, ta ashi.

Paisa linük nung nütsüng crore 25 bo kanga sensak tia nungi anitetba metetdaksü.

Iba atema World Bank ama International Institutions-i yimjak nung India nem tenüngsang agütsür, aser tangbo ajak kasa züngshiba tsütsü India ya alima nung temaba jenjang nung aliba linüktem rongnung densema lir, ta pai metetdaksü.

"Iba tetezü kasa mezüngshiba kanga ajema kümdar aser kasa züngshiba jenjang tajungba kümdar. Iba temelenshi ya alimai reprangtetdar," ta paisa shisem.

Bihar ya India nung ozüng alema inyakba yimtiba lir: Rahul Gandhi

New Delhi, Chiteni/July 14 (Agencies): Hombarnü Congress Party lenir aser Lok Sabha nung Opposition Lenir, Rahul Gandhi-i Bihar nung tzüzüng-ozüng tensa majungba atema state sorkar sashia aitsüogo.

Bihar ya India nung ozüng alema inyakba yimtiba kümogo, ta pai metetdaksü.

Rahul Gandhi-i social media X ajanga, Bihar nung lenirtemi nüburtem küzmüka alitsüsa meinyaker, ta metetdaksü.

Paisa, Bihar Chief Minister Nitish Kumar-i pa menden küzmüksü atema kanga mazüangi inyaker aser BJP nungi minister temi commissions agir, ta aitsü. Item oji pusema Gandhi-i anogo 11 tsüngda Bihar nung nisung 31 tepsetba osangkakettem nung adokba 'screenshots' lemsatop.

"Kinük-kisang ajaklen tetsübu lir, kibong ajak nung tipmatem lir! Mapa mangur lanurtem nisung tepsetertem kümdaktsür," ta pai metetdaksü.

Ita ka tsüngda Rahul Gandhi-i tang agi tanabenbuba 'Bihar ya India nung ozüng alema inyakba

yimtiba lir' ta jembir.

Bihar yimtiba Patna nung businessman, Gopal Khemka par kima khasetba sülen-a Gandhi-i Bihar ya ozüng alema inyakba yimtiba kümogo, ta aija liasü.

Küm tenet tejaklen Khemka'er jabaso-a khaseta liasü.

Taküm November ita nung Bihar nung assembly election agitsü lia Rahul Gandhi-i voters dang, "Tangbo vote ji sorkar melentsü atema dang masü saka Bihar küzmüksü atema agüjang," ta metetdaksü.

2020 küm taoba Bihar assembly election nung Congress Party-i menden 70 nungi toktepa liasü saka menden 19 nung dang takok angu.

2015 küm Bihar election nungbo Congress-i menden 27 nung takok ngua liasü.

2020 küm election nung Opposition Mahagathbandhan-i menden 110 dang angu; RJD-i menden 75, Congress-i menden 19, Communist Party of India-Marxist-Leninist (Liberation) menden 12, CPI-i menden ana aser CPI (Marxist)-i menden ana ngua liasü.

Tesüiba ita 9 tsüngda India-China tesendaktep junga kümogo: Jaishankar



July 14, 2025 nü China yimtiba, Beijing nung Union External Affairs Minister S Jaishankar aser Shanghai Cooperation Organization (SCO) Secretary General, Nurlan Yermekbayev na senden amendang tangokba noksa nung angur.

New Delhi/Beijing, Chiteni/July 14 (Agencies): Hombarnü External affairs minister, S Jaishankar-i, tesüiba ita 9 tsüngda India-China tesendaktep junga kümogo, ta metetdaksü.

Hombarnü China yimtiba, Beijing nung Union External Affairs Minister S Jaishankar-i Shanghai Cooperation Organization (SCO) Secretary General, Nurlan Yermekbayev den-a senden amen.

China foreign minister Wang Yi den senden amendang okila tenzüka Jaishankar-i, "Asen linük ana tsüngda tesendaktep tajungba akümtsüa tesüiba ita 9 tsüngda tesendaktep tsütsü kanga renlokogo. Iba ya arrtsülen sepaitem aienshitsü bangjemba aser arrtsülen tesünep yutetba ajanga lir. Linük ana tsüngda tesendaktep junga akümtsü atema tamendakdakji tamang kateta inyakba lir. Joko asenoki arrtsü

dak sendakba nung tanga lenlatem nunga rangloker inyaktsüji tongtibang," ta ashi.

Paisa, India-China tsüngda tesendaktep yangluba sülen taküm küm 75 ajunger, ta ashiba den külemi küm pongu sülen tang asentenshir Kailash Manasarovar Yatra tenzükba atema China dang pelaba metetdaksü.

Anepdang Jaishankar-i China tatong Tir, Han Zheng den senden amendang Jaishankar-i, SCO Tir atema India-i China pusemer, ta metetdakja liasü.

2020 küm Galwan Valley nung India aser China sepaitem tsüngda rara adoka linük ana tsüngda tesendaktep raksaba sülen tang mezüng external affairs minister Jaishankar-i China semdang. Taoba ita nunga India defence minister Rajnath Singh aser National Security Advisor Ajit Doval nati China semdanga liasü.



Srinagar, July 14: Srinagar yimti tejenba nung aliba Naqshband Sahib leper nung Jammu & Kashmir Chief Minister Omar Abdullah, National Conference (JKNC) Tir Farooq Abdullah aser tangartemi July 13 nung taküm tenla agüja asürtem nem akhüm agütsüba noksa nung angur.



TIR YIMYIM YIMOBILEM (EDITORIAL)

DIMAPUR

SANGTENNÜ

CHITENI 15, 2025

Assam ajangba timtem

Nagaland nung alirtemsa süaka Kohima len alirtemibo Assam ajanga senzüdang Assam police-temi nüngdak makaba nung timtem agütsüba kangabo ajangshia malitsü südi, saka talisa Mon, Mokokchung aser Longleng len alirtembo anogo shia kar mesüra karbo Assam ajanga süidang Assam police-temi tesem kar nungbosa soter timtem agütsüdar ta bilemdi. Atangji, tensa mapang majungdang nisung tamajungertem mitba mapang lenmang nung süisüponger garitem sota mitsüsbaji tim, ajsüaka National Highway nung anogo shia süisüpongertem sota mitsüsbajibo menügdaker, iba jagi Naga nunger tai maketba nisungtem aika timtem aser takoksa ajurur. Iba ama timtem takoksa ajuruba aremer maremtet, Konyak Union-ibo Assam Police dang mepelaba metetdaksüogo. Iba ama pei nübortem kidanger state police ket nung timtem ajuruba osangji angashia, Nagaland government-i Assam government den jembir asütsü imlar. Assam police-temi Naga nungertem Assam ajanga süidang timtem agütsüsbaji, ashiko, ozüng raksartem miter-a masütsüa akok mesüra gari kakat shitak ali mali reprangdangtsü asoshia masütsüa akok saka nükjidongjibo süngojemtsü meshitsü atema anendaksür asütsüa akok. Aji oda, gari ajak mita repranger meshitak kecha meputet nungji kanga pelaba shir yoktsü melen gari tasen mesüra gari tajung asüba tenüng nung tepela süngojemtsü sen tera meshitsüa akok. Atangji, Naga nungertem ya temeim mulungjang adenba tagütsünü nisungtem asünungji, aikati Assam police-i meshibaji mashishi-i odang agütsütsü, iba jagi Assam police yimya sübadaksür asütsüa akok. Joko, tangbo Mon aser Mokokchung district nungi Assam ajanga Dimapur atongdangbo Assam police nem anaben asem kabo gari ajak mita reprangdaksür külenang tonga alitsü südi. Item ama timtemji asenoki paidoktetba timtem ser nung asenoki asen lima nung terenlok mapa shitak meinyakba agi tangar nem mezügmeshidaksür. Ashi, asenoki tenemtsüng lenmang (Foothill road) ya Tizit nungi Dimapur tashi danga yanglutet asübo lenmang talangba bushia Assam ajangtsü menügdakla. Assam police-temi Naga nungertem Assam ajanga süiba temoatsütem mereprangteter dang ashiko, Mon nungi Dimapur tashi nung Naga nunger süisüpongertem len tom nung chiyongtsü ayokdak süngo jemtsüba aser chiyongtsüba agi Assam nunger kwikabo takar kümdaksüdar asütsü. Aji dang masü saka Naga nunger süisüpongertem gari totzü ayokdak gari totzü enokba agia Assam nung totzü ayokertem koda tajangzük ngua alitsü. Itemji angatet asübo, Assam policetemi asenok len tom nung sota timtem agütsütsü melen nüngdak mapang teyariang yarila. Ano külen asenok government nung alirtemi asenok Assam majangi Nagaland nungbo tesem ka nungi tesem ka tongtetsüsa tenemtsüng lenmang yangluba nung ya temulung agütsü asübo, asenok Assam policetemi timtem agütsüba nungi jenbuba dang masü saka tang asenok Assam ajang senzüdang gari totzü nung aser chiyongtsü nung endokba sen ajunga ya Nagaland nung Naga nunger nem agütsütsü. Aji oda, Foothill Road ama tongtibang lenmang ka lapokdang, gari senzüsbaji dang masü saka nisungtem tajangzük angutsüsa mapa aika adoker. Item mapatem rongnungji lenmang nung nisung kari chiyongtsü ayokdak lapoktsü, kari gari totzü ayokdak lapoktsü aser pei lu aser atsüki nung züsentetba aonsutsütema lenmang nungji melamelaa yoktetsü aser tangalen yoktsü. Iba ama tajangzük aika lir ser nung asenok ajak longjemer tang tashi foothill road meyanglutetba ya asennok asoshi tamakok aser takoksa tuluka lir. Aji oda, tang ama Konyak Union-i Assam ajang Naga nunger senzüdang Assam police-temi timtem agütsüba indang mepelai sangoktsü dang, Nagaland nung tangartem ola madokyonga foothill road ajang süiba ali kiburtemi danga foothill road yaktasa renemtsüla ta government nem takangba agüja ola adok nungbo, ashiko, asen government-ia ano tali temulung tagütsüba agüja inyakra. Asen government-ibo asenok majep tashi kecha magütsütsü, anungji asenok ajepstüla.

OLEMSABANG

Mei mapang tanurtem dak shirang adokbatem

Source - Internet

HEAT STROKE



SYMPTOMS



PREVENTION



Sunstroke:

Anü tatsük agi pudaktsüba ajang sunstroke asütsü melamelar. Anü tatsük apudang tanur kima nung kazüdaktsüra heatstroke agi kangshitsü aser tanur temang metaa shirang aitsü.

Tepzüno:

Temang kanga tatsük akümba ajang tepzüno amala adoktsü.

Allergy:

Tatsük mapang sun allergy aser heat allergy den külemi tanurtem dak allergy tapu balala agi kangshitsü.

Tzü ajang menatepba tashidak:

Cholera, typhoid, jaundice, dysentery, amoebiosis, diarrhea aser ibala mesükba tashidaktem melamela menar aser item ya talisa kima nung chiyunga senzüba ajang lir.

Chiyongtsü nung miim chisemba:

Tatsük-talem mapang chiyongtsütem nung bacteria kanga bulua adoker aser iba ya ajang chiyongtsü nung miim chisema kangshir. Iba ya lemyiwa mapang kanga ataloker.

Merla ajang menatepba tashidak:

Tesem balala nung tzü atsüngdendak merlatem kanga züiner aser iba jagi dengue, malaria aser merla agi metepba ajang tashidaktem adokdaksür.

Poliovirus:

Iba tashidak ya tatsük mapang anguba virus ajang adoker. Poliovirus agi shiranger tanurtemji terok nung timtem adoktsü aser temang metaa shirangtsü. Iba sülen anogo ishika lir meningitis mesüra paralysis agi kangshitsü.

Meiwa mapang tanurtem tashidak nungi noktangtsü tasa kar:

- # Lenmang nung süngjanglijang mesüra chiyongtsü tapu balala ayokba mechidaktsütsüla. Tanur nem totzü nung asangba chiyongtsütem mechidaktsü tajungba. Süngjanglijang, aonsotsü aser süngjang nungi agizükba tzütem peria chia-jemdaktsütsüla.
- # Tanurtem tzü peria ajemtsü ajungshitsüla. Tzü tajung aser mesen maliba tzü jemdaktsütsüla.
- # Kima-yimdong nung senzüdang tzü peria bener senzüla aser mapang shia tanur nem jemdaktsütsüla.
- # Tasen tzü, narkol tzü aser ibala mesükba tzütem ajang temang nung tzü talila kümdaktsür. Iba tzü ya tanur nem peria jemdaktsütsüla.
- # Tanur nem süoshi tepungba aser loose fitting clothes semdaktsütsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Alima nung Yisu kürakyanglu tulutiba Spain nung yanglutsü



Brazil kübok Rio De Janeiro nung aliba 'Christ the Redeemer' kürakyanglu noksa nung angur.

July 14, 2025: Spain kübok Boadilla del Monte ya alima nung temeshi aini aoer Khristantemi kanga sapua semdangba tesem ka kümdaktsütsü nükjidong nung Spain-i 2030 küm tashi nung alima nung Yisu kürakyanglu tulutiba yanglutsü.

Sacred Heart Project-i yangluba kürakyangluji metong nung metre 37 (feet 121) aser lenden nung metre 60 (feet 196) asütsü, aser ibaji ajanga tang Brazil kübok Rio De Janeiro nung aliba 'Christ the Redeemer' kürakyanglu ajatetsü.

Spain nung yanglutsü aliba Yisu kürakyanglu dangji "Sagrado Corazón de Jesss de Boadilla" ta ajatsü. Iba kürakyanglu ya Spain yimtiba, Madrid nungi kilometer 15 shi pilar aliba tesem ka nung yanglutsü.

Sacred Heart of Jesus Association of Devotees-i iba project inyaktsü.

Alima nung tejashi aser telemsa tulu adoka aliba mapang nung tai toktep aser temeim temaitsü Yisu kürakyanglu yanglutsü.

Iba project ya 2027 küm tenzüksü aser 2030 küm tashi nungbo renemtsü. Iba project ya yimtenren party kecha-ia mashishii temelaba agütsüogo.

Iba kürakyanglu design ji sculptor, Javier Viver-i asü. Kürakyanglu tekolak aser temangji 'reinforced concrete' agi yanglutsü aser tekaji 'carbon fiber' agi yanglutsü.

Yisu teka anapronglaji songlaa yanglutsü; koba tetezü meimchir azüitba lir. Tiyongtsü nung temelungjang metre 2.5 alitsü aser tesemdangertemi temelungjang telung jagi ia pei tanela jenjang asadangtetsü.

Yisu Khrista tejakji 'Shroud of Turin' nung ajemdaker yanglu. 'Shroud of Turin' sü ya atangji Yisu Khrista süadokba sülen Pa tasü mang alepba sü liasü asütsüa akok, aser Artificial Intelligence (AI) tools ajanga-a iba sü nungjagi Yisu

Khrista noksa adokdakja sayuogo.

'Shroud of Turin' dangji 'Holy Shroud' taka ajar. Iba sü tanep ya süklep (feet) 14 shi liasü, aser iba sü nungji nisung ka tejak tera angur.

Tang iba süji Italy kübok Turin nung aliba St. John the Baptist Tenla kidang yua lir. Yaküm study ka ajanga 'Shroud of Turin' ji Yisu Khrista aremdang amshiba sü asütsüa akok, ta bushiteta liasü. Shroud of Turin ji 1354 küm nguteta liasü, iba sülen northern France nung aliba yimtsüng ka nung mezüng sayaa liasü.

Ajisüaka 1389 küm iba süji tiyazü ta aitsü aser 1980s nung study ka ajanga-a iba sü nung noksaji tiyazü yangluba lir aser iba süji 1260 AD nungi 1390 AD mapang nung amshiba liasü ta jembü.

Ajisüaka 2022 küm x-ray study ka ajanga, süji atangji Yisu Khrista taküm aliba mapang; küm 2,000 tejaklen liasü aser iba süji Yisu asüba sülen Pa tasü mang aleptsü atema amshiba sü liasü, ta sangdonga liasü.

Artificial intelligence (AI) site 'Midjourney' dang iba sü nung mejangjai aliba noksa nungjagi Yisu Khrista atangji noksa agizükang, ta asüngdanga liasü.

AI ajanga adokdaktsüba tebur noksa nungji kouji tabupang dang nungi tera talangba lir aser bangsemo lir. Iba noksaji akhidang nungi amshiba Yisu noksa kürak lir.

Kasa noksa nungjisa Pa tejak aser temang nungji tarak kar keta lir.

Association of Devotees of the Sacred Heart of Jesus organization-i ashiba agi, Yisu Khrista temang nung zübo aika aketba temaitsü kürakyanglu nungji tapok aika alitsü. Iba denji külemi item tapok ajanga kürakyanglu telungji sangwadaktsütsü.

Alima tesem balala nungi nija temelungertemi Sacred Heart Project atema senotsü

tenla agütsütsü. Iba project nung Euro sen million 17 indoktsü. Tang tashi nung Mexico aser Poland na nungi temelungertemi Euro sen 90,000 tenla agütsüogo.

Ajisüaka Spain nunger kar aser yimtenren lenir karibo iba project aitsür. Loktilba dak sendakba tebilemtsü onük aika lia iba project ajanga amajok nung senotsü tali lalushibongtsü ta parnoki ashir.

"Boadilla nung kiojen asüba nung sen jenti adoker, anungji iba project atema ali lezmzüksüsbaji tim masü," ta yimtenren lenir, Alessandra del Mónaco-i ashi.

Social media nunga karibo, iba project ya tanela dak sendakba mapatong ka masü saka theme park ka dang lir, anungji senotsüji hospitals, shisaliok aser timtemertem yariba nung dang indoktsüla, ta ashi.

Item taittsüba dak sendakba nung Association-i, "Onoki iba ya senotsü lalushibongba ka mesüdaktsüner saka teimla anguba mapa ka südaktsüner. Telemsa tulu adoka aliba mapang ka nung iba ya tai tokteptsü atema tesangwa ka südaktsüner," ta metetdaktsü.

Association-isa, iba project ya sobaliba aser tamangba yimsü maitsü ajungkettsütsü atema lir, iba dak alia tenla aruba nungi shilem 10 agibo temeim mapa inyaktsü, ta metetdaktsü.

Association of Devotees otongdar, Ana Marķa-i, "Atangji iba project atema senotsü aika nüngdaker, ajisüaka iba ya nisung aika puatsü aser Yisu Khrista den mapang tajung agitsü asoshi ajungshitsü atema lir," ta metetdaktsü.

Tenla shidak dang arura 2030 küm June ita tashi nungbo iba kürakyanglu renema semzüksü aser iba tesem ya temeshi ainlen jajar Khristan tamangertem atema tongti tesem ka akümtsü imlar, ta Association-i metetdaktsü.

ANOGO ABEN TSÜNGREM DEN

Tanelaji teremsep

1 Tesa. 5:19

Alima nung Tsüngrem mapa matalokdaktsütsü asenoki nokdaktsü makok saka asenoki Pa tanela asenok taküm nung remseptsü akok. Asen taküm nung Tanela Temeshi mapa inyaktsü Tsüngremi asenok nem nüji agütsü. Kodang tanelai ashiba tashi mangalir, mesükshi-i yutsüdir, mesüra sentokdir asenoki asen taküm nung pa remsemdaktsür. Isaia ainkari iba nungi adokba rasaa ashir: "Aser Pai ashi, oang aser iba nübur dang shiang, atangji nenoki angashir saka mangatetter, nenoki atangji angur saka memeteter" (Isaia 6:9; Mathi 13:14-15).

Kodang nai temenen menadir, Tanela Temeshi-i nü dang temulung meyiptsü ashir. Nai ashi mangai toktsüra aser temulung memeyipra Tsüngrem O nung ne mulung meranga akümtsü. Tsüngremi ne taküm asoshi mulunga aliba jembira aser nai aji songtemra, ne taküm nung Tanelai-i mejembitsü mapang ka arutsü. Tanelai jembiba naimaneni sentokra Tsüngrem nungi joko nai kecha O mangashitsü. Nai maneni Tsüngrem O nung tekong merangra, Pai ne nem O tasen kecha magütsütsü. Ne taküm nung Tanela Temeshi ola menokdangtsü kümdangang. Pa tanelai-i ashiba ajak nungbo na sünepba malitsü saka Pa O-i na talubusa taküm dangi anitsü.

UK-i linük 10 nung tamangertem reshikangshiba anema inyaktsü

July 14, 2025: UK sorkari ajemdaker reshikangshi linük ter nung tamangba yimsü nokdangtsü atema nung ajemdaker reshikangshiba indangindanga tanga linüktem anema Freedom of Religion or sorkar den jembitsü, ta Belief (FoRB) atema inyaktsü, metetdaktsü. ta special envoy David Smith-i metetdaktsü.

Osangbenertem den jembidang North nung Foreign Office maparen nung freedom of religion or belief (FoRB) benoktsü aser rangloker inyaktsü," ta Smith-i, "Ni lenla pongu nung rangloker inyaktsü," ta metetdaktsü.

"Temelenshi adoktsüsa aliba linüktem, kanga tenüngdaktiba linüktem aser UK den tesendaktep junga aliba linüktem nung rangloker ni inyaktsü," ta pai metetdaktsü.

Linük 10 ji Vietnam, Algeria, India, Nigeria, Pakistan, China, Syria, Ukraine, Afghanistan aser Iraq linüktem lir.

Ukraine dak alaka tanüngba linük 9 yabo alima nung Khristantem anema inyakba linük tamajungtibatem rongnung densema lir (Open Doors' World Watch List).

David Smith-i, mezüngbuba nung UN aser Organisation for Security & Co-operation in Europe ama International tentet balala den amalitepa inyaktsü aser tanabuba nung, sorkari UK den tesendaktep junga aliba linüktem den inyaktsü, tetezü ketdangsertemi yimsü nung

ajemdaker reshikangshi nokdangtsü atema indangindanga tanga linüktem sorkar den jembitsü, ta metetdaktsü.

Tasembuba nung, linüktem tsüngda teloktep tashi itshitsü atema inyaktsü aser pezübuba nung Foreign Office maparen nung freedom of religion or belief (FoRB) benoktsü aser lenla ajaklen nungi meimchir temeden atema inyaktsü, ta pai metetdaktsü.

Tatamsa sorkari lokti tentet balala den longjemer inyaktsü, ta pai ashi.

"Tamangba yimsü balala amangertem tsüngda tangatettep aser akhümtsübutep alitsü atema osangtsüsang lemsateptsü. FoRB

ajungkettsütsü aser kümzüksü atema nenok teyaritepji tiyongtsü südaktsütsü," ta Smith-i metetdaktsü.

Yaküm sorkari takok tulu ana anguba lemsatep. Mezüngbuba nung, taküm küm tetenzüklen Cuba nunger pastor Lorenzo Rosales Fajardo chiokogo aser tanabuba nung, Nigeria nunger mamanger Mubarak Bala mapang talangka tepuokdak aliba sülen Humanists International aser UK sorkari tiyongtsü ia inyakba ajanga chiokogo.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Terajem

(n) angatetba (comprehend)


* Terajem shisatsü agi mapa shitak inyakteter.

Teraksa

(n) mejungi aküm (broken, damaged)

* Tanü loktiliba nung teraksa ya ochimashiba nungi tenzük.

OLONG PAITEP # 7209



TIPIEN

1. Sorochiokdang ya amshir- (7)
4. Ki telungi ayi - (3)
7. Pei dang tambu dang ajaba - (3)
8. Yagi teberem nung mesüiter - (6)
10. Tenüki ajitetter - (5)
11. Teti - (5)
17. Aria bilemba shisatsü - (6)
18. Aruya aliba - (3)
19. Aor tenüng ka - (3)
20. Kilong telemsa - (7)

LANGTSÜNGLEN

2. Shiba - - - - - ? - (6)
3. Temaitsü - (5)
5. Inteter aliba nisung - (4)
6. Talangka mao - (3)
9. Medem - (3)
12. Tapu aika - (6)
13. Ayong nung jajaba - (3)
14. Mesaklok - (5)
15. Inyakmaba - (4)
16. Temulung süngzükdaktsüba - (3)

OLONG PAITEP # 7208 TELANGZÜBA

TIPIEN :


1. Tesüngjem, 5. Tetemsü, 6. Oru, 8. Rür, 9. Ozü, 11. Lemjem, 14. Anü, 15. Longkak, 16. Ashikülak.

LANGTSÜNGLEN :


2. Entsü, 3. Mersü, 4. Otia, 10. Zünga, 12. Jakla, 13. Maka.

NAI-A YA METETTER MA

Shark



Ray



Nisungi meteta aliba shirurutem rongnung ana dak dang cancer tashidak agi matonger. I temji tzüym nung aliba ango tulu Shark aser Ray na dang lir. I ba ango anaji yangi noksa nung angur.

Mizoram nung Myanmar nung biometric enrollment tenzüksü

Aizawl, Chiteni/July 14 (Agencies): Mizoram sorkari state nung jenoka aliba Myanmar nung refugee tem indang biometric aser demographic osang tejangja bentettsü atema inyakdar, ta Home Department ketdangsür kati ashi.

Ketdangsür yagi ashiba agi, iba inyakyim ya July ita tatembangbuba hopta nungi tenzüksü imlar.

Paisa, Myanmar nung refugee tem ya Foreigner Identification Portal amshia online ajanga züngoksemtsü aser mezünguba internet junga aliba jila aser yimtsüngtem nung inyaksü, ta metetdaksü.

Pai ashiba agi, tawa state-i arurtem densema Myanmar nung refugee tem ajak iba inyakyim ajanga ayimjemtsü.

Ketdangsüri ashiba agi, iba inyakyim atema sorkari sen lakh 38 lezmüksüogo, koba Centre sorkari agütsütsü. Nüngdak dang süra senotsü talila agütsütsü, ta pai shisem.

Paisa, refugee tem aika internet connectivity majungba kinük nung aliba tesemtem nung jenoka lir asünung offline mode-a benoka inyaksüsa akümtsü, ta ashi.

Biometric enrollment exercise ya deputy commissioners tekolak ser district administrations-i benoka inyaksü. DC-i,

tenüngdakba hadirtem ajak agütsütsü ta pai shisem.

Ketdangsürtemi ashiba agi, Myanmar nungi aruba refugee 35,000 dak tema state kübok tesem balala nung jenoka lir aser Champhai district nung timba jenoka lir.

Ajisüaka refugee tem ya kwi ali mejangjar, kechiyong Myanmar nungertem ya mapangshia pei yimtsüingi oli aruli asür.

Refugee tem ya timba Chin state nungi Chin nungertem lir, shirnok Mizo nungertem den shilu ka dang lir.

2021 küm February ita military-i sorkar atsüngba sülen parnok ya Mizoram-i jena arua jenoka lir.

Manipur nung brown sugar seret 2.19 apu

Imphal, Chiteni/July 14 (Agencies): Central security forces aser Manipur police na senteper temesepba mozü shibelener asem den brown sugar seret 2.193 puogo.

Temesepba mozü ya gari ka nung miima bener lia puogo. Assistant Sub-Inspector Akbar Huissain-i, New Keithelmanbi Police Station Officer-in-Charge nem agütsüba osang ka nung aija alir Ginminlen Haokip (24), Holminlen Khongsai (29), aser Seigoumang Haolai (27) nung ya NDPS Act dak ajemdaker puogo. Parnok asemprongla ya

Kuki-Zo nung lir.

Ken o maneni bushisüngdangtsü atema aija alir asemprongla ya police ket nung July 22 nü tashi ayutsü. Parnok ya state ka nungi ka ta temesepba mozü shibelenba telok ka den sendaka lir aser parnoki joko küm ishika Churachandpur kübok Kangpokpi district nung temesepba mozü agüja arua liasü.

Churachandpur nungi Kangpokpi-i Scorpio tanak ka nung brown sugar bener odar ta osang tejangja angazükba sülen New Keithelmanbi Police

(Kangpokpi ASP (Ops)-i anir), Noney Police, Assam Rifles, aser CRPF nungeri July 9 nü meita aoba sentong ka ayongzüka liasü.

Pongringlong yimtsüng leni aoba lenmang nung Tupul apu nung gari tem sota bushisüngdangba mapang sepaitem yagi registration number maliba Scorpio tanak ka sot, koba Churachandpur nungi Kangpokpi-i oya liasü.

Gadi bushisüngdangba mapang gari kilem nung miima takdang ka yanglur idakji soap case 196 nung brown sugar sepa bener aliba nguteta liasü.

Tripura nung kinungtsü tepsetba atema nisung ka apu



Agartala, Chiteni/July 14 (Agencies): Tripura Police-i, kinungtsü tepsetba ken o ka nung nisung ka puogo. Iba tetsürla tasü mang ya West Tripura district kübok Bamutia Kali Bazar nung lar kidang July 10 nü nguteta liasü.

Asüla ya Gopa Bhil ta jangjaogo, aser la ya lar kidang sür lia nguteta liasü. Osang angazükba sülen SDPO Mohanpur Sabyasachi Debnath aser Lefunga Police Station OC Sahadeb Das na densema ketdangsürtemi iba tesem semdanga liasü. Tetsürla ya kodaser asü aji jangjatsü atema tasü mang ya post-mortem asoshi bener yoka liasü.

Police-i Hombarnü Tripura State Rifles ketdangsür aser personnel matsüngdang ken o asadangogo aser iba mapang Biswas-i tatalokba rasa shia liasü.

Police source kati ashiba agi, yi ajemba ajanga tena aiben mangatettep adoka liasü. Iba tesem nung alirtemi ashiba agi, Biswas aser Bhil naprongla yi jemer liasü aser Bhil ya yi dak dang metaloker liasü. Parnokisa, la yi tali ajemba

Ajia alisang Biswajit Biswas ya atsükshishia senzüa liasü saka mapang tatsüka lir Lefunga Police Station nem pasasa bendanga agütsüogo, aser pai pa kinungtsü aletseta südaktsüba nangzükogo.

Police-i Hombarnü Tripura State Rifles ketdangsür aser personnel matsüngdang ken o asadangogo aser iba mapang Biswas-i tatalokba rasa shia liasü.

Police source kati ashiba agi, yi ajemba ajanga tena aiben mangatettep adoka liasü. Iba tesem nung alirtemi ashiba agi, Biswas aser Bhil naprongla yi jemer liasü aser Bhil ya yi dak dang metaloker liasü. Parnokisa, la yi tali ajemba

ajanga senotsü nunga tetsükdatsü adokba ajanga tena aiben mangatettep adoka liasü.

Osangbenertem den sensaksemba mapang Biswas-i ashiba agi, la kingutsüi yi ajemtsü atema sen meshiba mapang pa dak teka sangshia liasü. "Ni anogo nung yi liter ana asem metuzüker aser kodang ni la nem sen magütsüdir idangji lai kü dak züka liasü," ta pai ashi.

Police sources-i ashiba agi, Gopa Bhil ya Biswas kinungtsü tasembuba liasü.

Biswas, shiba ice-cream ayoker ka lir pa tang police ket nung yua lir aser temzüng ozüng dak ajemdaker ken o bushisüngdangdar.

Paul Biya-i Cameroon tir ka ama kümsük ti buba inyakner

Yaounde, Chiteni/July 14 (Agencies): Cameroon Tir Paul Biya, shiba arishi küm 92 tain lir, pai taküm October 12 nü linük tir election agitsü aliba nung kümsük ti buba atema tokteptsü sentong sangdongogo.

Biya ya alima nung linük ka tir teinyakdak rongnung tambutisang lir aser pai iba osang ya Deobarnü social media X nung French aser English oshi nung sangdonga liasü.

"Tir election nung nia candidate ka lir. Nenok tenzüksü küdak temulungtetba aliba aser tanü asenoki timtem balala ajurua aliba ya puteper ta angatettsüla," ta pai zülua liasü.

Biya ya ano tir kümsük tasen ka tenzüknern, aser pai takok ngura arishi küm 100 jungnüa tir inyaksü. 1982 küm Ahmadou Ahidjo tir meden nungi aluba sülen tang tashi Biya ya tir Cameroon tir inyaka arur.

Pa temang manemi aliba indang aiben nüburtemi jembi aser tesüsa taoba küm anogo 42 tashi yimjak nung mongui liasü. Pa ano maneni tir election nung tokteptsüba ya ajaki imlaa liasü saka Deobarnü social media post magütsü tashi mejangjai liaüs.

2018 küma pai iba küm tir election nung tokteptsü asoshi social media amshia sangdonga, nüburtem den digital sapangtem nungi osangtsüsang agütsütepba tetenzüker liasü.

Tang yimsü tesüdak Cameroon People's Democratic Movement (CPDM) aser dangar temi taoba küm nungi yimjak nung Biya dang ano kümsük ka inyaksü asoshi tokteptsü ayongzüka arur.

Ajisüaka opposition party aser civil society telok kari pai mapang talangka yimsü süa aruba ajanga rongsenketzüng aser democratic terenlok mainer ta ashir. Taoba mapang külem süa aliba telok ana governing coalition yutsüogo aser election nung pei sasa tokteptsü sentong sangdongogo.

"Tir Biya-i ano tokteptsü sangdongba ya Cameroon indang political transition terenlok makai atsüngdaka aliba temaitsü tejangja lir. Küm 40 dak tema yimsü süa aruba sülen, linüki kasahi masü tasen kumshiba aginer. Cameroon nunger democratic temelenshi aser ochishir lenir langa lir," ta human rights advocate aser lawyer Nkongho Felix Agbor-i ashi.

Deobarnü sangdong ajanga office atema Biya temang anema aser temsüa lir asü ta asüba nung o intep asendenshitsü. Pa yimjak nung kangabo mangur aser tir indang office nung tashi tait chief of staff nem mapa nungloksür.

Taoba küm pa anogo 42 tashi manguba sülen October ita Cameroon-i meyipa shilanga pa temang majung asütsü ta

nüburtem ratatepa liasü. Sorkari pa anema lir ta ashi saka pa health indang jembishinü masütsü tenokdangba agütsü aser ibai national security indang lir ta ashi.

Biya-i 2008 küm kümsük tatakzük agien, anungji pa tanen makai tokteptsü lenmang lapok. 2018 election nung pai vote shilem 71.28 agi takok angu, saka opposition party temibo tim masüba mapa inyak ta aitsü.

1960s tetenzüklen France aser United Kingdom nungi nüchiso anguba sülen cocoa aser totzü pera aliba Central African linük nungya tir ana dang lir, aser Biya ya tir meinyaktettsüsa shiranga mesüra asünungbo pa melenba nung tepenja tulu adoktsü.

Biya ama opposition lenir aikati tir asoshi tokteptsü tebilemba lemsatepa lir aser item rongnung 2018 election runner-up Maurice Kamto (Cameroon Renaissance Movement), Social Democratic Front nungi Joshua Osih, lawyer Akere Muna aser Cameroon Party for National Reconciliation nungi Cabral Libii dena lir.

Biya kübok Cameroon rongsenketzüng nung timtem jenti ajuru aser English jembiba region tem nung separatists rara adokba aser north len Boko Haram telungpuri ali rakzükb densema tesem balala nung insecurity lir.

US-i Ukraine dangi Patriot missiles yoktsü: Donald Trump

Maryland, Chiteni/July 14 (Agencies): United States Tir Donald Trump-i Ukraine dangi Patriot air defence systems yoktsü ta shiogo, kechaser Moscow-i amakba tembangtsü asoshi Russia Tir Vladimir Putin-i jembishinütsü memulungba ajanga par (Trump) administration tezü atangba sayur.

"Parnok dangi asenoki Patriots yoktsü, koba parnoki kanga nüngdaker," ta Trump-i Joint Base Andrews, Maryland nung osangbener dang Deobarnü ashi.

"Putin-i nisung aika aoksadaktsür. Pai o junga jembir aser nikongdang nisung ajak dak bomb pokloksür," ta Trump-i ashi.

"Anungji, yangji timtem ka lir. Aji ni maginer."

Ukraine dangi Patriot batteries ya kwi yoktsüar ano telemtetba magi saka "parnok kar angutsü, kechiaser parnoki kumzüka alitsü nüngdaker," ta Trump-i ashi.

Trump-i taoba hopta ang par administration ajanga Kyiv nem agütsütsü asoshi Europe nung NATO allies dang nok-nü ayoktsü telemtetba agiogo ta shir lia Trump-i tang iba

sangdong ka agütsü.

Trump-i NATO Secretary-General Mark Rutte den ajuruteptsü lir aser iba mapang Kyiv nem nok-nü agütsütsü sentongtem nung rangloksü imlar.

Trump-i Russia dak sendakba nung tongtipang sangdong ka Hombarnü agütsütsü ta mesüshiba sülen Rutte-i Washington, DC semdangern alitsü.

Trump indang sangdong nungya Ukraine asoshi nok-nü tesashi dena alitsü, ta tenüng maliba osang ana ajanga Deobarnü ashi.

Ukraine nung rara tekeraba nung tembangdaktsütsü nangzüka nübuyima liasü, saka yimjung tezüngzüktep yanglutsü Putin-i memulungba ajanga Trump tezü atangba tali akumer.

Putin-i mapang tatsütsü asoshi rara anena atatsübo mulung, saka US-i condition kecha makai anogo 30 ceasefire alitsü asüngdangbabo pai magizük.

Ukraine-ibo agizüker aliba proposal yagi Kyiv sepai anidenshitsü aser nok-nü tali bendantsü asoshi maongka agütsütsü, ta Russia-i ashir.

"Pa teti kanga junga liasü,

saka nüngdak makaba ka akum," ta Trump-i Putin aitsü.

January ita White House-i meyipa shilangba sülen Trump-i Kyiv asoshi teyari ajemtsü aser Washington-i teyari agütsüba ajanga US taxpayer dak tali metsüker aser Ukraine Tir Volodymyr Zelenskyy ya yimjung asoshi tetsükdaktsü lir ta shia liasü.

Taoba US tir Joe Biden mapang lempzüksüba sen ajanga Ukraine nem maneni nok-nü agüja arur, saka Trump-i nok-nü tasen yoksemtsü memulung. Moscow aser Kyiv tsüngta yimjung alitsü ita aika meranga arur July 7 nü Trump-i Ukraine asoshi nok-nü yoktsü ta sangdong.

Deobarnü Trump dang Russia asoshi sangdongtsü aliba nungya Moscow anema tenokdangba tem dena lir asü ta asüngdang dang, Trump-i langzütsü memulung saka Putin dang mepelaba nenshia ashi.

"Ni Tir Putin dang kanga mepelar. Pa ya pai jembiba ama inyaker nisung ka asütsü ta bilema liasü. Aser pai kanga junga jembitsü, aser aonung pai nisungtem dak bomb pokloksütsü. Asenoki aji maginer," ta Trump-i ashi.

OFFICE OF THE
TULI YAONGYIMSEN SENSO TELONGJEM
TULI: 798618, NAGALAND
TENÜNSANG AGÜTSÜR

Yaongyimsen nunger Wb.Takamanen Imsong jala **Kr.Bendanginla** Tuli College nungi Nagaland University kübok undergraduate (CBCS) Examination 2025 English (Hons) subject nung Top 1 jenjang ngutetba atema Tuli Yaongyimsen Senso Telongjem ajanga La nem konang tetutshi tenünsang agütsür.

Tsüngremi la taküm tarutsü wadang ajak nung maneni takokba nung len aniangma ta sarasademtsür.

Sdl/-
(TEMJENJUNGBA)
President, TYST

Sdl/-
(TAKOSUNEP)
Secretary, TYST

OFFICE OF THE
LONGSA CITIZEN CLUB
H.Q. Longsa Village
Dist.MOKOKCHUNG - 798601, NAGALAND
TENÜNGSANG AGÜTSÜR

Kr.Limajungla Jamir, (D/o Wt.Süngjemmongla & Wb.Tsüknungmar Longsa), tena jalai Nagaland University UG (CBCS) examination History Subject Top 1 jenjang nung takok tajung anguba asoshi asen LCC ajak tenüng nung tenünsang agütsür.

Tsüngremi ne wadang tarutsü anogotem nunga temoatsü nung aniangma.

Sdl/-
Sb.Arensosang
Tir

Sdl/-
Kr.Temjenyongla
Tongti Zülur

ALI AYOKER

AT NIHOTO VILLAGE, NEAR 4 LANE
PLOT AVAILABLE ANY SIZE
Rate: Rs. 170/Sq. ft.

- Contact -
9612242850
7005386130

Israel-i amakdang Iran tir tera yiru

Tehran, Chiteni/July 14 (Agencies): Tehran nung June 15 nü Supreme National Security Council indang senden ka nung Israel-i tayimtsü amshia amakdang Iran Tir Masoud Pezeshkian tera yiru, ta Iran ketdangsür kati ashi.

Sorkar indang kongsang asem tekolak tem dak tenük yoker tepsettsü meranga amak, ta ketdangsüri pa tenüng memetetdaktsüi ashi.

Sorkar indang executive, legislative aser judicial branches indang tekolaktem den ano danga ketdangsürtem dena aliba senden nung anüngdang teroto tera süyir amak.

Semi-official Fars news agency-ia Israel-i Iran den anogo 12 raradang ketdangsürtem tepsettsü merangba osang tejangja sangdonga liasü, koba Iran tiri sensaksem ka Hombarnü sangdongba nung mezüng metetdakja liasü.

Tehran anüolen government facility ka indang lower level nung senden mena aliba mapang amak, ta Fars ajanga ashi. Iba ki telungi aiba aser temai adokba tesemtem nung missiles trok khalokja jena aoba lenmang nokdang aser mopung aitiba shibanga liasü.

Iba mapang electricity kanga mejungi raksatsü saka tir densema Iran ketdangsürtem ya 'pre-designated emergency hatch' ka ajanga jena ao aser iba mapang tir ya tetsüng nung

tilaka yirua liasü.

Tsükchir temi mezüng-mezünga iba tesem jangjatetba mechi senden nungya Israel nunger itdangiter liasü asü ta ketdangsür temi bushisüngdang tenzükogo, ta news agency ajanga ashi.

Taoba hopta US media figure Tucker Carlson den sensaksemba mapang, Israel-i pa tepsettsü merang ta Pezeshkian-i ashi. "Hao parnoki merang... saka tamakok ajuru," ta pai ashi.

Israel-i Iran dak June 13 nü nungi tenzüka amakdang linük mitkar tanishir aser nuclear scientists tem tepset.

Tehran aser Washington na nuclear ken o jembitsü asoshi ajuruteptsü anogo ana lia Israel-i amak, anungji Iran indang atomic programme mechi tezüngzüktep yanglutsü nükjidong nung jembishinüba terenlok makai anenadok.

Iba rara mapang Iran nung nisung 1,060 tepset, ta Iran indang Foundation of Martyrs and Veterans Affairs ajanga ashir.

Israel-i amakba mechi Iran-ia meyiper tayang kepzüka drones aser missiles khaloktsüba mapang Israel nung nisung 28 tepset.

Iran-i ballistic missiles aser drones amshia Israel mitkar aser itdangiter indang headquarters tem nung tenük yoker amak, saka US tetsüngtai ia ceasefire sangdong.

Sinner-i tang mezügbuba Wimbledon kokogo



Chiteni/July 14, 2025

(Agencies): Deobarnü Wimbledon tebur kija asaya nung Jannik Sinner-i Carlos Alcaraz koka tang mezügbuba iba asayamung kokogo.

Sinner-i final asaya nung defending Wimbledon champion Carlos Alcaraz ya 4-6, 6-4, 6-4, 6-4 agi koka liasü.

World No. 1 aser No. 2 asayaba final asaya nung Sinner-i pa dak sempet tajung aliba sayua kanga süngjemer asaya-a mezügbuba Wimbledon aser Grand Slam

pezügbuba kokogo.

Final asaya ya Alcaraz-i kanga tashi ita tenzüker aser mezügbuba set nung drop shots aser forehand shot tem kanga junga asaya-a asaya 6-4 agi akok.

Ajisüaka Sinner-i asendenshir tajungba asaya tenzüker aser tanabuba set nung asaya tetenzüklen Alcaraz indang serve break süa pai tanabuba set akok. Pai service aibelen mesüi ao aser tongtibang break points den kümzüka asayaba den rally tem akok aser Alcaraz-i shot

junga masayatetba mapang pa merenshia liasü.

Asaya nung aser talisa set pezügbuba nung Alcaraz-i service break asütsü atema kanga meranga asaya saka Sinner-i temulungtetba tulu nung kanga meranga nokdangba reprangtetogo

Spain nung asayar shibai 2022 küm nungi Wimbledon nung asaya ka nung danga tamakok mongui liasü, pai deciding asayatsü atema kanga nongshia asaya saka maongka tajungtem magiteti liasü.

Final asaya metenzük tsüngda Alcaraz asaya 24 nung khien danga tamakok mongui asaya liasü, kong pai Wimbledon nung Novak Djokovic madak final ana atonga akokba densema asaya 20 tashi nung khien danga tamakok mongui liasü.

Asaya anapronglai kanga junga asayaago, saka Sinner-i kanga consistency süa asayaba aser pai aibelen ishiba menaba ajanga asayar ana ya bendanga liasü.

Iba final akokba sülen Sinner ya Italy nung teburtem rognungi Wimbledon akokba mezügbuba asayar kümogo.

Nagaland nung mezügbuba Pickleball Tournament asayaago

Dimapur, Chiteni/July 14

(TYO): Nagaland Pickleball Association (NPA), aser Indian Pickleball Association (IPA) na longjemer 1buba Nagaland Pickleball Open Deobarnü Aiko Greens, Dimapur nung takok ngua asayaago. Iba asayamung ya PWR 50 sanctioned asayamung ka liasü.

Iba asayamung ya Nagaland nung mezügbuba official pickleball asayamung ka liasü, kong state aser Assam amala kidanger state tem nungi team 32-i shilem agia liasü. Asayamung nung tebur tarep aser tarep temeyoktep asaya liasü.

Men's Doubles Open:

Winners: Mr. Megotsolie Khate & Mr. Vilasier Khate
Awarded 15,000 aser champions' trophy.

Runners-up: Mr. Dilip Mohanty & Mr. Aryan Zaffar
Awarded 10,000 aser runners-up trophies.

Mixed Doubles:

Winners: Mr. Dilip

Mohanty & Ms. Nazneen Rahman

Received 10,000 aser trophies.

Deobarnü iba asayamung reprangtsü atema nüburtem aika adenshia, ka jangrabangra asayatepogo.

Kasa mapang nung NPA-isa, Assam Pickleball Association dang parnoki nongita yariba atema kanga pelaba lemsatep, koba ajanga Nagaland nung iba asayamung mezügbuba takok ngua asayatetogo.

Maneni NPA-i, Dilip Mohanty dang kanga pelaba lemsatepogo, shiba Tournament Director liasü aser pai asayamung kanga achaayanga tetsükdaktsü kecha madoki kanga junga tembangogo. Nagaland Pickleball Open mezügbuba ajanga Northeast nung iba asaya kanga kara renloka aoba sayur aser state nung pickleball asaya ajungkettsü atema NPA bendanga agütsür aliba kuli agütsür.

Chelsea-i FIFA Club World Cup kokogo



Chiteni/July 14, 2025

(Agencies): Deobarnü MetLife Stadium, East Rutherford, New Jersey nung Club World Cup final nung Chelsea-i goal 3-0 agi Paris Saint-Germain kokogo.

Iba asaya nung Cole Palmer-i goal ana idaktsü aser João Pedro nem assist ka süja liasü.

Palmer-i asaya mezügbuba shilem nung minute 22 aser 30buba nung penalty area telung nungi goal temesüktep ana idaktsü. Pai tang asaya aliba season kanga junga sayaago aser goal 18 idaktsüogo. Iba sülen pai João Pedro nem ball tajung ka agütsü, koba Pedro-i minute

43buba nung goalkeeper Gianluigi Donnarumma adena metsüokja liasü.

Iba takok densema Chelsea-i Club World Cup tanabenbuba kokogo. Parnoki 2021 küm iba asayamung akok. Iba mapang team tenet dang asaya liasü. Iba asaya akokba sülen Chelsea-i USD 128,435,000 nungi 53,815,000 tsüngda aazüker alitsü.

PSG pur taküm Ligue 1, Coupe de France, aser mezügbuba Champions League akokba sülen asayamung tongtibang pezügbuba akoktsü timla liasü, saka parnoki final nung

Chelsea majangtet.

Chelsea shirnok Premier League nung pezügbuba nung tembang aser UEFA Conference League kokogo parnok asaya tepeyong tashi taitba asaya liasü.

Final masaya tsüngda PSG-i iba asayamung ya akoktsü ta aikati bilema liasü, aser parnoki final matong tsüngda taoba asayatem nung goal 16 idaktsür liasü aser meyiper goal ka dang chir liasü.

Asaya nung yellow card trok aser red card ka agüja liasü, aser iba ajanga Europe nung club tulutibatem tsüngda kanga toktepba asayaba sayur.

Aiden Markram nem ICC Player of the Month award agütsü

Chiteni/July 14 (Agencies): South Africa nung batter Aiden Markram nem June ita

atema ICC Men's Player of the Month naroküm agütsüogo. Australia den Lord's nung ICC World Test Championship Final nung kanga junga asayaba sülen pai iba naroküm agizükogo.

Küm 27 lir South Africa-i ICC trophy ka akokba nung pai kanga tongtibang shilem agia run 136 yanglu aser tongtibang wicket ana agia liasü.

"Iba naroküm anguba ya maongka ka lir. Ozü team aser South Africa atema ICC World Test Championship akoktsü asoshi teyari agütsütetba ya kü atema kanga tongtibang lir," ta Markram-i iba naroküm anguba sülen ashi.

Iba asaya nung Markram-i batting junga anemba dang masü saka ball-a kanga junga ona Steve Smith aser Beau Webster na senteper batting

kanga junga mena aliba mapang pai Smith out süja liasü.

Mezügbuba innings nung pai batting jungabo mementet aser pa run ka danga meyanglui Mitchell Starc-i out süja liasü.

Ajisüaka tanabuba innings nung South Africa-i run 74 agi Australia memenebpa den tatembangbuba wicket anati run 59 bendenloker aliba mapang Markram-isa, Josh Hazlewood out sütsü aser iba sülen batting kanga junga mena team takok dangi ani.

Asaya akoktsü atema run 282 arishiba mapang Ryan Rickelton kanga kara out süaka Markram-i Wiaan Mulder aser captain Temba Bavuma na den longjemer team takok dangi ania liasü.

Iba asaya nung Markram-i run 136 yanglu, koba South Africa team-i küm aika sülen ICC asayamung ka akokba mapang kanga tongtibang liasü.

BILEMDANGANG

: "Kechi nung na züngshia mali idakji nü mapang tintok."